

重修四庫全書

定興縣志卷二十四

文錄

傳狀

雜文

雜記

喬千戶行狀

陵川 郝經

鹿太公傳

容城 孫奇逢

耿生傳

歸安 茅元儀

處士耿保汝先生傳

容城 孫淦

耿孝子傳

容城 孫用楨

劉烈母家傳

王太岳

祭楊仁山文

范文源

魏忠節公暨孝烈先生遺像贊

鹿邁祖

職官題名記

明邑令趙訥孝義

續職官題名記

邑令李瑾襄陵

續職官題名記

邑令白尙登鐵嶺

儒學教職題名記

訓導郝陞南官

儒學科第題名記

趙宸

儒學貢士題名記

張鎬

順天府營建記

中州元好問

臨漪亭記

郝經

乙丙記事

孫奇逢

高平行記

王太岳

定興縣志卷二十四

文錄

傳狀

雜文

雜記

喬千戶行狀

郝經

高祖諱曾祖諱祖諱父諱順公諱惟忠字孝先涿州定興東
王里人世業農爲大家母李氏腹公七月而寡公幼聚嬉異
於他兒及長有志略捷勇善射衛紹王遇弑北鄙用兵四海
有改卜之兆公慨然輟耕長嘆曰時事如此大丈夫樹立之
秋也何區區爾爲遂落魄不事生理俠遊燕趙間貞祐初宣
宗南渡河朔大擾公以義軍從今萬戶張公起於定興保西
山之東流鳩樹義旗招叛亡跨山連海威聲大振北兵扼吭

相而不得進行臺聞之便宜授公定遠大將軍恆州刺史
受經略苗道潤節制從張公鎮撫西山諸堡砦張公勇而有
謀膽決善戰燕趙之豪附之者衆每以方略授公使戰輒中
機會嘗以少擊衆由是威名冠張公之軍國朝悉兵南下萬
戶張公逆戰于狼牙嶺馬跌被執時公居守東流塢北兵以
張公至塢下招諭使降公拒之諸軍旣登公猶拒守自若進
攻拔之張公以腹心之舊爪牙之用能全節守義義而釋之
公荷更生之庇以死力自效遂從下雄易安保諸州宋人乘
金之亂使彭義斌將兵襲河朔至澶魏建旆而北公以一軍
蹂其鋒諸軍壯之眞定武仙叛並山諸州縣堡砦皆拒守萬

戶張公會諸軍擊之令公攝帥將騎兵數百步兵三千人鼓行而西時敵兵將聚保於狼山砦公召諸軍吏曰彼將歸其巢穴我遏之必殊死戰歸師勿遏軍志之戒也不若覆諸山下啓其歸路彼旣得歸莫有鬪志是獲獸于穴也衆從之適兵旣過公鼓譟奮擊大破之時有別部將陷敵者公橫戈突陣而入力戰救之乃獲免於是諸叛望風降附遂入鎮州武仙奔公會諸軍追之馘虜甚衆遂會攻彰德轉戰至齊魯駐軍滕州牙山中夜敵出不意襲壘而入公獨騎追戰奮戈大呼橫衝逆擊諸軍始覺譟以繼之敵衆駭散填山湮谷而奔於是公名震河朔矣其圍益都也

援兵數萬幾及城公掩擊敗之獲衣糧戰具甚多遂閉其門會內兵闢門突出公嬰其鋒短兵接戰敵敗走主帥旌公勇以勵諸軍先是萬戶張公開都元帥府于滿城以公爲元帥都監遷副元帥至是帥還仍行二安州元帥事未幾出鎮唐縣行元帥事復從張公鎮新衛州辛卯冬渡河會戰于鈞州遂會諸軍圍汴金義宗北渡丞相白撒圍衛州力戰卻之追奔至黃龍岡復會諸軍圍蔡河南平張公入覲以公將行營征淮南歲甲午朝廷論功張公陞奏曰臣憑藉國家威靈所向克捷臣何力之有亦臣有一二爪牙熊虎之助臣之副將喬惟忠戰功甚多乞加寵異於是

朝廷以璽書金符錫公仍以千戶世其封自是連年大舉
伐宋公感戴恩遇益自奮勵其破棗陽攻光黃等州功尤
多丙午夏寢疾五月二十七日薨于第春秋五十有五寓
殯于順天府城之東原公美鬚髯沈勇善戰遇大克捷固
無自得之色其攻黃州也敵兵夜襲諸柵公率銳卒戰主
帥舉火視之見青甲而黃馬者戰甚力翌日主帥懸賞求
之公竟不自陳其不矜如此雖奮起畎畝藹然有閎閎簪
笏之風事母孝每酣戰而歸必頓整冠服拜而問安及居
喪過於毀瘠遂感疾不起治家有法束諸子以義節於自
奉爲千戶侯而服食不過于華夫人毛氏子男五人孫三

人女孫一人歲庚戌將改塋先塋文碑墓隧故次第始終
昭灼者于右鴻儒碩筆其諒于茲孤子珪等狀

文忠集

鹿太公傳

孫奇逢

太公名正號成字侍御豫軒公長子太常伯順父也侍御
宦游公拮据家務一意以明農課子爲己任故侍御公無
憂內顧太常未嘗北面一塾師而業就生平勤儉持家卹
人之急甚於己當危之與甯直無難色恒慮人有難盡之
言也公表弟劉正心以一言之諾養其妻子終身爲之娶
婦者二嫁女者二蓋慷慨好施自其天性與人不設城府
不岐面背臨事嶄然有斷性簡朴聲色服御去之若免惟

孝友節義以此自律並以誨人侍御公寢疾躬侍湯藥衣不解帶者三年嘗一夕數起假寐几榻閒微聞侍御欠伸狀卽屏息而俟早夜禱瘳頭鬢爲白其侍母夫人日夕依戀伯順嘗一再迎養京邸席未煖而歸裝是束曰奈何戀游子而牽堂上老人遠思也七十歲居母喪猶寢苦食淡哭泣如禮終身之慕殆謂是與篤念手足與弟直友歡垂白無間鰥居日伯順欲擇一侍子奉起居公不許曰若以而翁爲苦耶吾自覺無不足處且此事早已看破固無一可者風雨蕭然彌發嘯咏性不解飲而雅好客流連下榻丙夜不倦客或請少休則謂君豈以老夫爲醒眼君輩舉

爵吾汨汨亦若有酒腸也枯棋三百拉一二同調盤礴其
閒竟日對壘並忘勝負制詞有溪山寄傲覺海鷗猶有機
心木石與居笑雲鶴仍無定性得公神矣恩命三錫年登
八旬每出入安步閑中卽往返百餘里亦止一僕一騎無
異布衣時曰吾幸未憊庶幾與里閑故舊遇諸塗何可使
其引避而轍迹畏人將無挾兒輩尊寵於車上儻哉有司
至門恒踰垣以避歲請鄉飲始勉一赴後絕不往孫化麟
中辛酉解元製一褐袍伯順自塞上歸一裘爲壽公復嚴
戒之嘗謂生不能挽流習而席祖父以自張藉子孫以自
奉此其人殊堪喁噓蓋公以高風古韻生平爲王彥方陳

太邱逾四十年鄉里蒸蒸何論家庭閒矣至天啟中璫禍起網羅密布一時如左魏周諸君子皆伯順密友俱遭禍三家子弟賓客絡繹江村謀所以爲左右力公挺身周旋不計禍患甚至醵金應比聲聞長安旁觀代爲公危公不顧第曰老人籌此已熟矣不知命無以爲君子我肯惜一身爲吾子蘭籍辱崇禎朝己巳之變范撫軍入援公湊粟五百餘石犒師嘗割腴地數十畝代合族貼軍其仗義急公類如此當伯順發金花落職後復從高陽相國督師渝水人皆爲公慰且危公獨掀髯長笑曰臣子不當如是耶持祿養交非吾子事且如先侍御抗言大節何迄伯順殉

難猶毅然曰得其死矣世受國恩可借此以報九廟之靈
亦復何恨觀此公所自處與爲子處無論富貴於生死又
何如也公嘗擁五世子於一堂人倫之盛海內寡二後以
孫化麟爲父叩閭悴死終不勝鬱痛以歿海內聞而悲之
乃余猶不能無感余於公以猶子侍乃不督過若以孺子
可教也歲時風雨譚塵棊枰遇余必色飛卽忿怒激切時
徐出一言無不立解不知何以得此於公也余交伯順四
十年公四十年如一日後子孫之殞及公病以迨屬纊余
無一時不侍左右屢欲爲傳顧痛不能屬筆聊述其概如
此亦承公之素命也

孫徵
君集

耿生傳

茅元儀

明末天下多事朝廷以左御史光斗督畿內士左公曰文非筆墨武非弧矢然外筆墨則緯畧不彰外弧矢則膽志不壯乃下令士較射其甲乙與文等畿內人士競操矢合社定興爲畿南嚴邑弓箭社更多獨無耿生好諫之迹或曰素嫻之然未試也左公以文得耿生寘高等試竣有司請較射公曰以令先之蓋欲其習也及令試獨耿生九發不失一士謹呼令亦喜動顏色入以告公次日易其的加遠小焉耿生復九發不失一左公曰士固有不得教而興者得如生數人焉以鼓其同黨勝於教矣乃刻兼材錄以

班畿內首耿生生遂以文食其學之餽然其人退然如不
勝衣事親宛順先意爲迎宗姻之婦過其母親視滌器調
膳童婢有過不加呵叱母爲加一餐及母病請以身代母
竟以起生平無二色無私藏與兄弟析箸取其瘠者曰我
能使之腴售負郭田二頃人欲以善價更其券笑而謝之
又惇惇篤好君子也然魁岸多力不雄冠而人畏焉鹿伯
順先生講學江干奮起曰我能領其意會病不果督其子
權往曰爾與於斯我夕死可矣人於是皆曰左公得士又
不獨於射也

耿氏譜

處士耿保汝先生傳

孫 淦

先徵君及門高第以經濟著者湯潛菴斌魏蓮陸一鰲若
而人以學行著者耿逸菴介王伸之餘佑崔定齋蔚林若
而人以文章著者薛儀甫鳳祚費燕峰密高薦馨僑趙寬
夫禦眾若而人以介節著者張子果中馬構斯爾楹若而
人而才品兼優學養俱粹兼眾人之長則保汝一人而已
先生諱極號誠齋保汝其字范陽人自幼寡言笑不好嬉
戲雖童穉儼如成人六歲時其父携之謁鹿忠節公善繼
一見異之曰老成端重大成之器也九歲喪父卽矢志力
學以慰母心一日與諸昆弟言志有欲博科名者有欲持
門戶者先生獨曰吾願爲第一人耳蚤歲受學於杜徵君

越旣而從遊先徵君於夏峰深有會於文成良知之旨先徵君有詩貽之曰千里從行氣未降讀書喜爾得姚江龍場三載成何日博得良知滿一腔又謂知之真信之篤行之勇於保汝僅見之其學以慎獨爲宗以存誠爲要以日用倫常爲把柄點點滴滴謹守師傳故聞道最早同人凡有疑難欲請之師或得之師傳輒先生質之一經剖晰無不渙然冰釋一時同學如湯潛菴趙寬夫崔定齋耿逸菴皆遜謝不及先徵君亦稱爲此吾門尹彥明也家本素封由富而貧流離患難若固有之隨時隨地磨鍊體認淵然深造六十歲涵養愈純喜怒不形於色每語人曰大道只